



НИЙСЛЭЛИЙН
ИРГЭДИЙН ТӨЛӨӨЛӨГЧДИЙН ХУРЛЫН
ТЭРГҮҮЛЭГЧДИЙН ТОГТООЛ

2016 оны 03 сарын 23 өдөр


Дугаар 35

Улаанбаатар хот


Журамд нэмэлт, өөрчлөлт оруулах тухай

Нийслэлийн эрх зүйн байдлын тухай хуулийн 8 дугаар зүйлийн 1.2 дахь заалт, Соёлын тухай хуулийн 14 дүгээр зүйлийн 1 дэх заалт ыг үндэслэн Нийслэлийн Иргэдийн Төлөөлөгчдийн Хурлын Тэргүүлэгчдээс ТОГТООХ нь:

1. Нийслэлийн иргэдийн Төлөөлөгчдийн Хурлын Тэргүүлэгчдийн 2016 оны 09 дүгээр тогтоолоор батлагдсан Соёл урлагийн сургалт, цэнгээнт үйлчилгээ эрхлэх журмын 2.1.3 дахь заалтаас автомат тоглоомын машин, 3.1.1 дэх заалтаас тайзны яриа, илтгэх урлаг, 3.1.3 дахь заалтаас автомат тоглоом, 4.1 дэх заалтаас тайзны яриа, илтгэх урлаг, 4.3 дахь заалтаас автомат тоглоом, 10.2 дахь заалтаас тайзны яриа, илтгэх урлаг, 10.4 дэх заалтаас автомат тоглоом гэснийг тус тус хасах, 10.4.2 дахь заалтыг хасах, 10.5.3 дахь заалтыг Тайчих үзүүлбэр үзүүлэгч нь нүцгэн биеэрээ ширээ дамжин бүжиглэх, үйлчлүүлэгчийн биед хүрэх, үйлчлүүлэгчид рүү хувцасаа шидэх гэж өөрчлөн найруулж, журмыг хавсралтаар шинэчлэн баталсугай.
2. Энэхүү тогтоолын хэрэгжилтэд хяналт тавьж ажиллахыг Нийслэлийн иргэдийн Төлөөлөгчдийн Хурлын Ажлын алба /Б.Энхболд/-нд тус тус даалгасугай.
3. Нийслэлийн иргэдийн Төлөөлөгчдийн Хурлын Тэргүүлэгчдийн 2016 оны 09 дүгээр тогтоолыг хүчингүй болсонд тооцсугай.



СОЁЛ УРЛАГИЙН СУРГАЛТ,
ЦЭНГЭЭНТ ҮЙЛЧИЛГЭЭНИЙ ЖУРАМ



Нэг. Нийтлэг үндэслэл

1.1. Нийслэлийн нутаг дэвсгэрт соёл урлагийн сургалт, цэнгээнт үйлчилгээ эрхэлж буй аж ахуйн нэгж, байгууллага, нийгмийн өмнө хүлээх үүрэг хариуцлагыг тодорхойлж, хэрэгжүүлэх үйл ажиллагаанд нутгийн захиргааны эрх бүхий байгууллагаас зохистой харилцааг дэмжих, зохицуулалт хийж, хяналт тавихад энэхүү журмын зорилго оршино.

1.2. Энэхүү журмыг Нийслэлийн нутаг дэвсгэрт соёл урлагийн сургалт, цэнгээнт үйлчилгээний чиглэлээр үйл ажиллагаа эрхлэж байгаа аж ахуйн нэгж, байгууллага бүр дагаж мөрднө.

1.3 Соёл урлагийн сургалт, цэнгээнт үйлчилгээ явуулах газруудын ажиллах цагийн хуваарийг нутаг дэвсгэрийн онцлог, хүн амын нягтрал, эрэлт хэрэгцээ, шаардлагыг харгалзан Нийслэлийн Засаг дарга батална.

1.4. Энэхүү журам нь Монгол Улсын Үндсэн хууль, Соёлын тухай хууль, Зохиогчийн эрх болон түүнд хамаарах эрхийн тухай хууль, Садар самуунтай тэмцэх тухай хууль, Архидан согтуурахтай тэмцэх тухай хууль, Тамхины хяналтын тухай хууль, бусад холбогдох хууль тогтоомж, Засгийн газрын тогтоол, түүнийг хэрэгжүүлэхтэй холбогдсон эрх зүйн хэм хэмжээгээр зохицуулагдана.

Хоёр. Нэр томъёоны ойлголт

2.1 Энэ журамд хэрэглэсэн нэр томъёог дор дурдсан утгаар ойлгоно.

2.1.1 “Соёл урлагийн сургалтын газар” гэж сургалтанд хамрагдагч иргэдээс төлбөр хураамж авч соёл урлагийн боловсрол олгодог аж ахуйн нэгж, байгууллагын үйл ажиллагаа эрхэлдэг объектыг;

2.1.2 Дэлгэцийн болон дурс бичлэгийн бүх төрлийн кино үзвэрийн газар гэж тусгай тоноглогдсон байр танхимд иргэд, олон нийтэд тасалбар худалдаалж, оюуны өмч түүнтэй холбоотой зохиогчийн эрхийн зөвшөөрлөөр бусдын бүтээгдхүүнийг үзүүлэх барилга байгууламж объектыг;

2.1.3 “Цэнгээнт үйлчилгээний газрууд” гэж ашгийн төлөө зорилготой нийтэд үйлчлэх тоног төхөөрөмж суурилуулсан, билльярдны өрөө, танхим , боулингийн төв, гулгах талбай /мөсөн, дугуйт/, дэлгэцийн болон мини гольфийн талбай, зэрэг үйлчилгээний барилга байгууламж объектыг.

2.1.4 “Караоке” гэж олон нийтэд соёлын үйлчилгээ үзүүлэх, иргэд зугаацан цэнгэх зорилгоор үйлчлүүлдэг тусгай тоног төхөөрөмжөөр тоноглогдсон өрөө, нийтийн заал, объектыг;

2.1.5 “Диско клуб” гэж иргэд, олон нийтэд төлбөр хураамжтай болон хураамжгүйгээр үйлчилгээ үзүүлдэг тусгай тоноглогдсон бүжгийн тайз, гэрэл, дууны төхөөрөмжтэй объектыг;

2.1.6 ”Тайчих клуб” гэж насанд хүрэгчдэд зориулсан үзүүлбэр буюу гоо сайхны таашаал төрүүлэх зорилгоор хүний нүцгэн биений урлагийг хийсвэрээр дүрслэн харуулах, бүжиг, тайчих үзүүлбэр, тоглолт үзвэр үйлчилгээ үзүүлдэг объектыг;

Гурав. Соёл урлагийн сургалт, цэнгээнт үйлчилгээ, тэдгээрийн төрөл

3.1 Соёл урлагийн сургалт, цэнгээнт үйлчилгээнд дараах төрөл хамрагдана.Үүнд:

3.1.1 Соёл урлагийн /дуу, хөгжим, бүжиг, кино, драм, загвар, хөтлөгч, жүжигчин, уран зураг, фото зураг, төрөл бүрийн хатгамал, нүүр будаг, хувиргалт / сургалтын газар;

3.1.2 Дэлгэцийн болон дүрс бичлэгийн бүх төрлийн кино үзвэр;

3.1.3 Цэнгээнт үйлчилгээний / видео тоглоом, мөсөн болон дугуйт тэшүүрийн талбай, билльярд, боулинг, дэлгэцийн болон мини гольф/ газар;

3.1.4 Караоке, диско клуб, тайчих клуб, нийтийн бүжиг;

Дөрөв. Соёл урлагийн сургалт, цэнгээнт үйлчилгээ эрхлэгчдийн эрх, үүрэг

4.1 Соёл урлагийн /дуу, хөгжим, бүжиг, кино, драм, загвар, хөтлөгч, жүжигчин, уран зураг, фото зураг, төрөл бүрийн хатгамал, нүүр хувиргалт / сургалтын газар;

4.1.1. Соёл урлагийн сургалт явуулах аж ахуйн нэгж, байгууллага нь зориулалтын байр, сургалтын тусгай хөтөлбөртэй байна.

4.1.2. Тухайн сургалт явуулж буй, аж ахуйн нэгж, байгууллага нь суралцагчдад сургалтанд хамрагдсаныг нотолж гэрчилгээ олгоно.

4.1.3 Соёл урлагийн сургалт явуулах хуулийн этгээд нь мэргэжлийн дадлага, туршлагатай багштай байх бөгөөд суралцагсдыг гарын авлага, сургалтын материалаар хангана.

4.1.4 Бүх төрлийн бүжгийн сургалт явуулах байрны шал стандартын шаардлага хангасан байх ба халтирах, суралцагч унаж бэрхээс сэргийлэх аюулгүй ажиллагааг хангаж ажиллана.

4.1.5 Сургалтын өрөө, танхим, заал нь механик агааржуулалтын систем, салхивч, байгалийн болон зохиомол гэрэлтүүлгийн хэмжээ нь стандартын шаардлага хангасан байна.

4.2 Дэлгэцийн болон дүрс бичлэгийн бүх төрлийн кино үзвэрийн газар;

4.2.1. Дэлгэцийн болон дүрс бичлэгийн кино үзвэрийг зориулалтын техник хэрэгслээр тоноглогдсон байр танхимд явуулна.

4.2.2. Дэлгэцийн болон дүрс бичлэгийн бүх төрлийн кино үзвэрийн газар нь “Зохиогчийн эрх болон түүнд хамаарах эрхийн тухай” хуулийн хүрээнд үйл ажиллагаа явуулна.

4.2.3 Кино үзвэрийн газар нь олон нийтийн хүртээл болгож үзүүлж буй бүтээлийн аюулгүй байдал, хадгалалт хамгаалалтыг бүрэн хариуцаж ажиллана.

4.2.4 Гадаад кино үзвэрийг бага насны хүүхдэд Монгол дуу оруулгатайгаар үзүүлэхийн зэрэгцээ бусад гадаад кино, үзвэрийг тайлбар бичиг, танилцуулгатайгаар нийтийн хүртээл болгоно.

4.2.5 Дэлгэцийн болон дүрс бичлэгийн бүх төрлийн кино үзвэрийн газрын нийт үзвэрийн 50-аас доошгүй хувь нь дотоодын кино, уран бүтээл байна.

4.3 Цэнгээнт үйлчилгээ; /видео тоглоом, мөсөн болон дугуйт тэшүүрийн талбай, билльярд, боулинг, дэлгэцийн болон мини гольф/

4.3.1 Цэнгээнт үйлчилгээний газар нь үйлчилүүлэгчдийн аюулгүй байдлыг хангаж ажиллах бөгөөд цахилгааны болон ажлын байрны эрүүл ахуйн дүгнэлттэй байна.

4.3.2 Үйлчилгээ үзүүлж буй хуулийн этгээд нь үйлчилгээний танилцуулга, дотоод журам, цагийн хуваарь үнэ тарифын мэдээллийг үйлчилгээ явуулж буй газарт сонирхсон этгээд танилцаж болохуйц газар ил тод байрлуулсан байна.

4.3.3 Боулинг, мөсөн болон дугуйт тэшүүрийн талбай үйлчилгээ үзүүлж буй хуулийн этгээд нь үйлчилүүлэгчдэд нэг удаагийн оймсоор үйлчилж, ариун цэврийн шаардлага хангасан хувцас солих өрөөгөөр хангагдсан байна.

4.4 Караоке, диско клуб, тайчих клуб, нийтийн бүжиг

4.4.1. Караоке

а/ Оюуны өмчийн газар, түүнтэй хамтран ажиллах хамтын удирдлагын байгууллагын зөвшөөрөгдсөн төхөөрөмжөөр үйл ажиллагаа явуулна.

б/ Караоке үйлчилгээ эрхлэгч хуулийн этгээд нь микрофоны нэг удаагийн шүлсний хаалтыг үйлчлүүлэгч үйлчлүүлээд гарах бүрт солих бөгөөд нэг удаагийн шүлсний хаалтны сурталчилгааны зурагт хуудсыг өрөө бүрт үйлчлүүлэгчийн нүдэнд харагдахуйц байдлаар ил тод байрлуулна.

в/ Караокены үг, ая алдаагүй зөв дуугаралттай байх бөгөөд мэргэжлийн ажилтнаар микрофон болон акустик тохиргоог хийлгэсэн байна.

г/ Караоке нь үйлчлэгч, үйлчлүүлэгчийн аюулгүй байдлыг хангах үүднээс эрх бүхий зөвшөөрөлтэй Харуул хамгаалалтын байгууллагатай хамтран ажиллах гэрээ байгуулсан байна.

д/ Караокены өрөө, заал нь дуу чимээ тусгаарлах тусгай зориулалтын материалаар доторлосон байна.

е/ Караокены өрөө, зааланд зөвшөөрөгдөх дуу чимээний дээд хязгаар 80dB байна.

ё/ Караокены дууны санг цагаан толгойн үсгийн дарааллаар ойлгомжтой, гаргацтай бичсэн жагсаалтыг хавтаслаж, сар бүр, тогтмол урын сангийн баяжилт хийсэн байна.

ж/ Караоке үйлчилгээний төхөөрөмжинд Монгол дууны сан 1500 –аас доошгүй байна.

и/ Нэг өрөөний нийт талбай $15m^2$ –аас багагүй байх ба агааржуулалт, салхивч нь стандартын шаардлага хангасан байна.

4.4.2. Диско клуб

а/ Галын болон цахилгааны аюулгүй байдлыг хангасан, хяналтын камер, дохиолол хамгаалалттай байна.

б/ Диско клуб нь дуу чимээ тусгаарлах тусгай зориулалтын материалаар доторлосон байна.

в/ Үйлчилгээ үзүүлэх зааланд зөвшөөрөгдөх дуу чимээний дээд хязгаар 100dB байх бөгөөд механик агааржуулалтын систем, байгалийн болон зохиомол гэрэлтүүлгийн хэмжээ нь стандартын шаардлага хангасан байна.

г/ Үйл ажиллагаа явуулах заал нь зориулалтын бүжгийн талбайтай байх ба талбай нь нийт заалны 40-өөс доошгүй хувийг эзэлнэ.

д/ Диско клуб нь орон тооны ДЖ-тэй байх бөгөөд ажилтны сонсголыг хамгаалах хэрэгсэлээр хангаж ажиллана.

е/ Бүжгийн талбайн шал нь үйлчлүүлэгчийн аюулгүй байдлыг хангасан халитардаггүй, чөлөөтэй хөдлөх, бүжиглэх шаардлага хангасан байна.

4.4.3 Тайчих клуб

а/ Цэнгээнт үзүүлбэр үзүүлж буй тайчих клуб нь тусгай зориулалтын бүжгийн тайз, талбайтай байна.

б/ Үзүүлбэр нь урлаг, гоо сайхныг харуулсан байх ба “Садар самуун явдалтай тэмцэх тухай” хуулийн хүрээнд тухайн үзүүлбэрийг үзэгчдэд үзүүлнэ.

в/ Цэнгээнт үзүүлбэр үзүүлэгч бүжигчид нь хувцаслалтын өрөө, душ, халуун усны өрөөгөөр хангагдсан байна.

4.4.4. Нийтийн бүжиг

а/ Нийтийн бүжиг явуулах байр танхим нь өлгүүр, хувцас солих өрөө, түгжээтэй хайрцаг, шүүгээгээр үйлчлүүлэгчийг хангана.

б/ Үйлчилгээ үзүүлэх зааланд зөвшөөрөгдөх дуу чимээний дээд хязгаар 80dB байх бөгөөд механик агааржуулалтын систем, салхивч, байгалийн болон зохиомол гэрэлтүүлгийн хэмжээ нь стандартын шаардлага хангасан байна.

в/ Нийтийн бүжгийн үйлчилгээ эрхлэгч хуулийн этгээд нь үйлчлүүлэгчийн аюулгүй байдлыг хангасан бүжиглэхэд тохиromжтой шалны стандартыг баримтлан ажиллана.

г/ Үйл ажиллагаа явуулах заал нь зориулалтын бүжгийн талбайтай байх ба талбай нь нийт заалны 80-аас доошгүй хувийг эзэлнэ.

Тав. Гэрчилгээ олгоход шаардлагатай бүрдүүлэх бичиг баримт

5.1.1.1 Соёл урлагийн сургалт, цэнгээнт үйлчилгээ эрхлэхийг хүссэн аж ахуйн нэгж, байгууллага дараах бичиг баримтыг бүрдүүлнэ.

5.1.1 Ажил үйлчилгээ эрхлэхийг хүссэн аж ахуйн нэгж байгууллагын хүсэлт албан бичгээр;

5.1.2 Үйлчилгээний нэр, үйл ажиллагааны чиглэл, зорилго, бүтэц, ажиллах цагийн хуваарь, үнэ, зэргийг тусгасан дотоод журам;

5.1.3 Аж ахуйн нэгж байгууллагын гэрчилгээ, удирдлагын цахим үнэмлэхний хуулбар;

5.1.4 Мэргэжлийн хяналтын газрын ажлын байрны тодорхойлолт, үйл ажиллагаа явуулж буй харьяа хорооны засаг даргын тодорхойлолт;

Зургаа. Гэрчилгээ олгох, татгалзах, хураан авах, хүчингүй болгох

6.1. Ажил, үйлчилгээ эрхлэн явуулах нөхцөл, шаардлага хангасан аж ахуйн нэгж, байгууллагад 1 жилийн хугацаатай гэрчилгээг ажлын 2 хоногт багтаан Нийслэлийн Соёл, урлагийн газраас олгоно.

6.2. Гэрчилгээ нь дугаар, түүний олгосон он, сар, өдөр, үйлчилгээний нэр, үйл ажиллагаа явуулах газрын хаяг, хуулийн этгээдийн регистрийн дугаар, хүчинтэй байх хугацаа, гарын үсэг, тэмдэг байна.

6.3. Холбогдох хууль тогтоомж, журам зөрчсөн аж ахуйн нэгж, байгууллагын үйл ажиллагаа явуулах эрхийг гаргасан зөрчлөөс хамаарч эрх бүхий байгууллага хуулийн дагуу торгох, давтан зөрчил гаргасан тохиолдолд Соёл урлагийн сургалт, цэнгээнт үйлчилгээ эрхлэх гэрчилгээг хураах, давтан хураалгасан бол хүчингүй болгоно.

6.4. Хүсэлт гаргахдаа хуурамч, буруу, ташаа мэдээлэл өгсөн нь илчлэгдсэн, журмын заалтуудыг зөрчсөн, гарсан зөрчлийг шалгах явцад худал, ташаа мэдээлэл өгсөн бол хүчингүй болгоно.

6.5. Гэрчилгээг зөрчлийн улмаас хураалгасан бол тухайн зөрчлийг бүрэн арилгасан тохиолдолд буцаан олгож болно.

Долоо. Нийслэлийн Соёл урлагийн газрын эрх үүрэг

7.1. Аж ахуйн нэгж, байгууллагад Соёл урлагийн сургалт, цэнгээнт үйлчилгээний үйл ажиллагаа явуулах гэрчилгээг олгох, олгохоос татгалзах, хураах, хүчингүй болгох;

7.2. Журмыг хэрэгжүүлэх, сурталчлах, ажлыг зохион байгуулж, хэрэгжилтэд хяналт тавьж ажиллах;

7.3. Гэрчилгээ олгоход шаардлагатай материалыг хүлээн авч судлах, холбогдох байгууллагатай хамтран хяналт шалгалт хийж ажиллах;

7.4 Гэрчилгээ олгогч нь тухайн үйл ажиллагааг хуулийн хүрээнд явуулах боломжтой гэдгийг нотлуулхын тулд шаардлагатай бусад мэдээлэл, нотлох баримтыг зөвшөөрөл хүсэгчээс шаардах эрхтэй.

7.5 Үйл ажиллагаа эрхлэгч хуулийн этгээд нь гэрчилгээг хүчинтэй байх хугацаанд зөрчлийн улмаас давтан хураалгасан тохиолдолд дахин 2 жилийн хугацаанд олголт хийхгүй байх эрхтэй.

7.6 Гэрчилгээ олгохын өмнө гэрчилгээ олгогч түүний томилсон албан тушаалтан нь үйл ажиллагаа явуулах газарт биечлэн шалгалт хийх эрхтэй.

Найм. Дүүргийн Засаг даргын Тамгын газрын нийтлэг эрх үүрэг

8.1 Холбогдох хууль тогтоомж, энэхүү журмыг нутаг дэвсгэртээ сурталчилж, хэрэгжилтэнд хяналт тавьж ажиллах;

8.2 Соёл урлагийн сургалт, цэнгээнт үйлчилгээний үйл ажиллагаа явуулж буй аж ахуйн нэгж, байгууллагад үнэн зөв тодорхойлолт гаргах,

8.3 Дүүргийн Соёлын асуудал хариуцсан мэргэжилтэн нь тухайн дүүрэгт гэрчилгээ авч үйл ажиллагаа явуулж байгаа аж ахуйн нэгж байгууллагын жагсаалт гарган бүртгэлжүүлэх;

8.4 Дүүргийн Засаг даргын Тамгын газар нь Нийслэлийн Соёл урлагийн газар, болон бусад эрх бүхий холбогдох байгууллагатай хамтран хяналт шалгалт хийж ажиллах;

Ес. Аж ахуйн нэгж, байгууллагын нийтлэг эрх үүрэг

9.1. Аж ахуйн нэгж, байгууллага нь Соёл урлагийн сургалт, цэнгээнт үйлчилгээний үйл ажиллагааг хууль, тогтоомж, журмын хүрээнд мэргэжлийн ур

чадвар, үйлчилгээний өндөр түвшинд явуулах ба энэхүү журмыг өдөр тутмын үйл ажиллагаандаа мөрдлөг болгон ажиллана;

9.2. Аж ахуйн нэгж, байгууллага нь үйл ажиллагааныхаа хүрээнд гэмт хэргээс урьдчилан сэргийлэх, сэтгэцэд нөлөөлөх болон мансууруулах бодисын хор хөнөөлийн талаарх мэдээллийг сурталчлах, үйлчлүүлэгчдийг сэргэжилүүлэх арга хэмжээ авч ажиллах үүрэг хүлээнэ;

9.3. Иргэдэд үйлчлэх орчинг сайжруулах, үйлчилгээний соёлыг дээшлүүлэхэд анхаарч ажиллах ба насанд хүрээгүй иргэнд хууль тогтоомж, журмын дагуу үйлчилгээ үзүүлнэ;

9.4. Тамхины хяналтын тухай хуулийг мөрдөж ажиллана;

9.5. Тухайн үйл ажиллагаа явуулж байгаа тухайн барилга, байгууламжийн гадна болон дотох талд стандартын шаардлга хангасан хяналтын камертай, бичлэг

нь 21-ээс дээш хоногийн хугацаанд хадгалдаг байх, дохиоллын системд холбогдсон байх буюу гэрээт хамгаалалтыг авч ажиллуулах зэрэг шаардлагыг ханган харьяа дүүргийн цагдаагийн хэлтэст бүртгүүлсэн байна.

9.6. Үйлчилгээ эрхлэхийг хүссэн аж ахуйн нэгж, байгууллага, ажлын байрны дүгнэлтийг Нийслэлийн мэргэжлийн хяналтын газраас авсан байх ба галын болон цахилгааны аюулгүй байдлыг бүрэн хангасан Онцгой байдлын газрын дүгнэлттэй байна.

9.7. Аж ахуйн нэгж, байгууллагын үйлчилгээний ажилтан нь үйлчлүүлэгчдээс ялгарах ажлын дүрэмт хувцастай байна.

9.8. Гэрчилгээ нь зөвхөн бичигдсэн хаяг байршилдаа хүчинтэй ба байршил хаягаа өөрчилсөн тохиолдолд 14 хоногийн дотор Нийслэлийн Соёл урлагийн газарт мэдэгдэж бүртгүүлнэ.

9.9 Гэрчилгээний хугацаа дуусахаас 14 хоногийн өмнө холбогдох материалыа бүрдүүлж сунгалт хийлгэнэ.

9.10 Гэрчилгээ, ажиллах журам, цагийн хуваарь, үнэ тариф зэрэг мэдээллийг ил тод үйлчилгээ явуулж буй газарт байрлуулсан байна.

**Арав. Соёл урлагийн сургалт, цэнгээнт үйлчилгээ эрхлэгч аж ахуйн нэгж,
байгууллагад хориглох заалт**

10.1 Журмын дагуу үйлчилгээ эрхлэгч аж ахуйн нэгж, байгууллагад дараах нийтлэг зүйлсийг хориглоно.

10.1.1. Соёл урлагийн сургалт, цэнгээнт үйлчилгээ эрхлэгч аж ахуйн нэгж, байгууллага нь Нийслэлийн Соёл, урлагийн газарт мэдэгдэхгүйгээр үйл ажиллагаа явуулах, зөвшөөрлийн гэрчилгээгүй үйл ажиллагаа явуулах, гэрчилгээг бусдад шилжүүлэх бусдаас шилжүүлэн авах, түрээслэх;

10.1.2. Мэргэжлийн болон эрүүл ахуйн шаардлага норм хангаагүй нийтийн орон сууцны нэг болон суурин давхарт үйл ажиллагаа явуулах;

10.1.3. Орчны болон иргэдийн амгалан тайван байдлыг алдагдуулсан үйл ажиллагаа явуулах, үйлдэл гаргах;

10.1.4. Техникийн аюулгүй байдлыг хангалгүйгээр үйл ажиллагаа явуулах;

10.1.5. Батлагдсан цагийн хуваарь зөрчих;

10.1.6. Гэрчилгээг хуурамчаар үйлдэх, эх хувиас бусад хуулбарыг байршуулах;

10.1.7. 21 нас хүрээгүй иргэнд болон хэт согтолттой иргэнд согтууруулах ундаа өгөх, худалдаалах;

10.2 Соёл урлагийн /дуу, хөгжим, бүжиг, кино, драм, загвар, хөтлөгч, жүжигчин, уран зураг, фото зураг, төрөл бүрийн хатгамал, нүүр хувиргалт / сургалт;

10.2.1. Энэ журмын 4.1.1, 4.1.2, 4.1.3-т заасныг хангаагүй сургалт явуулах;

10.3 Дэлгэцийн болон дүрс бичлэгийн бүх төрлийн кино үзвэрийн газар;

10.3.1. Үзвэрийн газар архи, тамхи, согтууруулах ундаагаар үйлчлэх;

10.3.2 Үзвэрийн үйлчилгээг орон сууцны хонгил, зоорийн давхарт явуулах;

10.3.3 12 наснаас доош насны хүүхдэд эцэг эх, асран хамгаалагч, харгалзах хүнгүйгээр үзвэр үзүүлэх;

10.4 Цэнгээнт үйлчилгээ; /видео тоглоом, мөсөн болон дугуйт тэшүүрийн талбай, билльярд, боулинг, дэлгэцийн болон мини голф/

10.4.1 Иргэдэд аллага, хүчирхийлэл, садар самуун, мансууруулах бодисын хэрэглээний сэдэв агуулгатай тоглоомоор тоглуулах;

10.5 Караоке, диско клуб, тайчих клуб, нийтийн бүжиг;

10.5.1. 2000 оноос өмнөх үеийн караокены төхөөрөмжөөр үйлчилгээ үзүүлэх;

10.5.2. Урын сангийн баяжилт хийгдээгүй, иргэд олон нийтэд үйлчлэх

10.5.3. Тайчих үзүүлбэр үзүүлэгч нь нүцгэн биеэрээ ширээ дамжин бүжиглэх, үйлчлүүлэгчийн биед хүрэх, үйлчлүүлэгчид рүү хувцасаа шидэх;

10.5.4. Садар самууныг сурталчилсан кино, клип, үзүүлбэр үзүүлэх, түүнийг сурталчлах дэмжих;

10.5.5. Гэрчилгээ эзэмшигч нь насанд хүрээгүй иргэнд тоглолт үзүүлбэрийг үзэхийг санал болгох, үйлчилгээ үзүүлэх;

Арван нэг. Журмын хэрэгжилт, хяналт

11.1. Соёл урлагийн сургалт, цэнгээнт үйлчилгээнд Нийслэлийн Соёл урлагийн газар, Нийслэлийн Мэргэжлийн хяналтын газар, Улаанбаатар хотын цагдаагийн газар, Нийслэлийн Онцгой байдлын газар, Дүүргийн Цагдаагийн хэлтэс, Дүүргийн Засаг даргын Тамгын газар хяналт тавьж журмын хэрэгжилтийг хангаж ажиллана.

11.2. Соёл урлагийн сургалт, цэнгээнт үйлчилгээний талаарх мэдээлэл, иргэдийн гомдол саналын дагуу хяналт тавих байгууллагууд нь олон нийтийн хяналтыг зохион байгуулж шийдвэрлэн ажиллана.

Арван хоёр. Хариуцлага

12.1. Энэхүү журмыг зөрчсөн аж ахуйн нэгж, байгууллага, иргэдийг Монгол Улсын холбогдох хууль тогтоомжийн дагуу хариуцлага хүлээлгэнэ.

12.2. Үйл ажиллагаандаа үйлчилгээний соёл зан харьцааны доголдол гаргаж үйлчлүүлэгийг хохироосон бол тухайн аж ахуйн нэгж, байгууллага, иргэдийн талаар хэвлэл мэдээллийн хэрэгслээр сэргэмжлүүлэх арга хэмжээ авна.

-----o0o-----